

abire permisissent: quo negato, tum metu in desperationem verso, concursum fuisse: Liguremque artem viribus addidisse, quindecim triremibus in insidiis locatis, quæ medio pugnae ardore in Venetos coortæ, haud dubiam suis fecerint victoriam. Cæterum, sex Genuensium, duas & triginta Venetorum naves non pugnassee: quæ metu, vel, ut alii tradunt, vi ventorum aversee certamen detrectarunt: ab reliquis acriter dimicatum, pluresque aliquanto Ligures quam Venetos cecidisse: atque ab initio ita a Ligure laboratum, ut jam fugam circumspicere cœpisset, quum quindecim illæ ex insidiis tumultuose egressæ, pugnam repararunt, ac prælio instaurato, Venetam classem omnino profligatam. Capta ad quatuor Venetorum millia cum ipso Andrea navium Præfecto: qui quum Genuam captivus traheretur, præ nimio dolore ita graviter totiensque triremi caput imegisse dicitur, ut antequam Genuam ventum esset, expirarit. Ricoaldus Ferrariensis auctor est, cum octo Genuensium navibus atque octoginta eo loco concursum: trigintaque Venetas prælio evasisse, quæ ab initio pugnam detrectarunt: captaque ad quinque hominum millia; nec ob eadem hostium ingentem Genuæ ullam victoriæ laticiam sentiri potuisse: publiceque prædicatum, majore ad Corcyram clade Ligurem quam Venetum affectum. Atque in hunc modum in Dalmatia pugnatum accepimus. Tantæ cladis nuncius ingentem luctum terroremque civitati attulit: sed imminentis periculi metus effecit, ut civitas ab omni mœrore aversa, continuo ad vires reparandas animum adjecerit: vulgo credere, victorem hostem (quia nulla esset classis quæ illius cursum, si Venetias versus movisset, impedire posset) non multo post cum tumultu affuturum. Sed eum in Græciam, vel domum potius, continuo abiisse ideo crediderim, quia post Corcyrensem pugnam nihil a Ligure gestum, non modo non in intimo sinu, sed ne in Dalmatia quidem reperio. Reparata classe, ne insulæ & maritima oppida, quæ in Ionio & Ægeio erant, sine præsidio essent, quinque & viginti triremes, Marco Basejo Præfecto, ex urbe sunt profectæ. Hæ quoque circa Helles-

*Andrea
Danduli
mors.*

pon-